

新纂雲南通志

盧

漢

題

纂



第一百零六冊

卷二百

列傳十二

卷二百一

列傳十三





Diagram with text in a rectangular frame, likely a table of contents or a list of items.

一	二	三	四	五	六	七	八	九	十
...	...	...	...	...	...	...	...	...	...



新纂雲南通志卷二百目錄

列傳十二 清

趙光朱嶠

黃琮寶墀

陸應毅

蕭培元 畢應辰簡  
宗杰附

方玉潤

馬之龍周文龍 革孚  
言附

李瀟

李謙

王正

趙漸

許承

許承

魏之

蕭

黃

新纂雲南通志卷二百

列傳十二

清

趙光朱嶧傳

趙光字蓉舫昆明人治經通大義善屬文工爲書隸制行純篤進退必以禮名聞里黨嘉慶庚辰成進士由翰林院編修拜江南道監察御史數上書言事介然不撓奏請論治江南輸粟吏抗弊坐如法道光中累擢兵部侍郎時政俗陵替州縣吏多不循法度互爲比姦黎民重困光上疏陳世務曰臣聞明主不廢戇直之論忠臣不諱危苦之言是以算無遺策而國家可安也今臣幸遭盛明之世居無諱之朝願昧死竭忠誠惟陛下留意而幸察之臣聞守令者天子之所與治天下也故古之王者明四目達四聰廣擇賢良保惠小民以正上

下之序致教化之隆蓋修治者親賢之爲急擇吏者循法之是尙詩  
曰愷悌君子民之父母此之謂也今之守令武健巧黠以爲能循良  
溫恭以爲拙豪門賈豎之子罔習吏事請託權貴朝納金粟而夕宰  
大郡內則家人姻婭縱爲毛鷲外則胥役簿吏舞法市恩朋進黨結  
無所回忌罷軟者敖盪怠忽翫過不治殘酷者扇虐肆威惟事誅斂  
鬻獄盜賦習爲固然及其罪惡彌彰衆議騰怨司道以事劾逐輒復  
挾嫌抵隙大府脅息懼并獲戾依違兩端委事不發附下罔上孰能  
忍懷陛下未察其由容奸不斥致使齊民賊蕩謗讟煩興或號呼道  
路或呻吟隴畝頗有睚眦之忿漸起離畔之心夫禍始於下吏而怨  
結於朝廷星星之火可以燎原理之至常無足怪者書曰昏墨賊殺  
咎繇之刑也臣請詔下督撫歲考守吏治行輒上吏部尙書課殿最

以聞誅姦邪褒廉正庶理既洽謗讟永息此範民之道也今國家歲糜帑粟養兵數十萬有能克敵定禍以安民衛土者乎夫一國之安危不在兵籍之多少而在訓厲之有方器甲利便士氣驍果雖少而不害爲彊器甲疲鈍士氣頹沮雖多而無救於亡將帥知此可以治軍旅矣間者天下久安無事將帥終老營伍聚耗糧粟不識戰守之事而居奉聲色之娛飫醲甘之味敗天子法侵稅攘粟坐擁梟騎大君自爲弁卒視爲廝隸器械壞而不治樓船將士不辨水程擊刺步伐又非素練卒當勁虜未及整陣而震越失措輒先奔潰堅兵利器轉爲虜用夫將惰則士偷息將驕則士怨積積怨已甚則挺險爲變是故軍行所止呵索吏民拘發役徒外內騷動城市爲空將佐懼變任使隳突而不敢禁制兵卒悍縱漸至於此非止耗財翫寇之弊亦

有不戢自焚之災此社稷之憂也臣愚以爲整軍必先選將將非其人兵雖衆不足恃兵囂於市刑非重不爲用今水陸將帥求其材勇驍武訓士有方可倚爪牙之任如楊遇春尤渤竇振彪之流蓋已寡矣然則急難指顧之間又何以收致命捍土之效哉夫投醪以變濁不如澄其源揚湯以止沸不如絕其薪是以勞心而救亂於後莫若先事籌計而亂自弭也弭亂之道籌計之宜易於舉羽特在陛下用之否耳天下之勢方失之壅蔽內爲承平無事而外有不測之變在上者坐候其變而莫之知此其所以勢且敗壞而不救也今歲數不登百姓糜敝盜賊肆行湘楚青徐咸受荼毒爲天下患至亡已也而朝廷未嘗發一卒以討捕之非縱盜賊也州縣守令苟且無事而不卹民患及夫變起命討吏役與賊相爲黨結先事漏洩至於毀禁戕



官事起不測往往有之大府懼干嚴誅匿狀不告小民墜於塗炭而無所告愬則羣從爲盜一方有急四面皆起臣恐變難之生奸謀之作由此始也陛下何不壹令州縣守令以期會發兵逐捕有縱蔽盜賊行不如期者痛以法治之舍此不圖非久安之計也古者制吏祿足以代耕由胥吏上至於卿相遞相增焉使其足以養廉恥而離於貪鄙之行然猶以爲未也更推其祿以及其子孫使其生也家室無不足之憂其死也子孫得所生養而有餘裕焉方今守令多選賈籍習爲華靡蕩嬉之行其祿養所得不足以自贍而必取盈焉至於交賂遺營貨產漁取賦緡朘削下民苟以肥私比期代解組紕欠官帑以巨萬計司道徇隱曲爲文惡斯風一啟吏競聚斂是以舊紕未補而新逋又積貪穢之俗日日以長是天下之大殘也而羣臣不察因

恬以爲治後必有災臣故竊爲陛下危之惟陛下以明察爲治以仁厚爲心使吏奸無所緣而民心歸從則太平之風可興於今臣愚不識大體願下明詔博詢公卿大臣採擇帝善其計而不能用咸豐初除拜戶部右侍郎奉使勘畿西煤鐵所饒具奏以聞還拜刑部尙書預修宣宗實錄轉領兵部事同治初改吏部尙書卒官謚文恪光性抗直所上封事言皆懇切不憚犯忤其譏切天下治忽利病之形至

咸同間皆如所言世稱其能

清史稿  
光緒志

朱嶠字擢堂通海人嘉慶己卯進士由翰林院檢討稍遷監察御史嶠爲人明察內敏又習文法修立名節以廉謹稱道光中畿輔大旱廣東副貢潘士成以捐貲助賑賞舉人準會試後此納捐者輒引爲例嶠上疏曰夫治天下者修教化建法度納民於軌物者也等之以

尊卑示之以廉恥罷倖進絕貨賂所以慎守名器也重選銓顯才譽  
守名器之重者也故選士賢則國安選士不賢則國危安危之機不  
可不察也今者陰陽失和歲連饑饉元元困乏府藏空竭陛下宜遂  
減服玩慎選舉修政刑答謝天譴雖有偏災不足患也若開邪枉之  
門長競賄之端使貲郎駟豎冒濫賢書行見風俗寢壞政日以亂如  
此望陰陽之調不亦難乎詩曰民之多辟無自立辟惟陛下多留聖  
思鑒戒禍始永停捐納者得賞舉人之例長保令德於無窮天下幸  
甚帝嘉納其言擢嶠鴻臚寺卿累遷內閣侍讀學士是時御史劉良  
駒條奏銀錢畫一章程旨交內外臣工覈議具奏嶠復上書言事曰  
臣聞泉布者國之大利民所以生養也是故聖人均賦以粟而平貨  
以錢物賤根乎錢少物貴因乎錢多錢少則重重則加鑄而散之使

輕多則輕輕則制法而斂之使重輕重之權操持於上此百王之通法也今也下擅輕重之權而上無平準之令守令輸銀於京師而細民納錢於郡庫富商豪賈乘之操贏多積銀逐利有司出賤易貴計其價耗不能相當夫事有召弊法有起奸假令下吏歲損祿金補羨賦數而無以贍養室家因爲贓奸苟獲微利雖董以刑威其勢不止爲法若此上何賴焉臣愚以爲當今國家之患不在錢少在乎鑄濫鑄錢既多而白金益賤物值騰躍而賦稅煩費必然之效也且夫銀品昂賤郡縣不同上將急而壹之乎則大爲煩苛而力有不勝縱而弗治乎則市價異倍錢法大亂苟非裒益盈虛行得其術何適而可哉臣請悉禁州縣無鑄錢以工本之銀發出易錢貯之官庫汰其輕脆則下不私鑄錢不患蕃平抑銀品令市丞折錢銀一兩多無過千

七百少亦千二百又州縣小吏胥役兵卒其祿養所給取便近層折  
值無許逾法其他西南邊郡並請縱令有司得自鑄錢就供軍士衣  
食之費而紓轉漕之力如此富商巨賈無所牟大利而財益出物售  
低賤此臣愚計之大略也夫銀錢相埒是謂平價爲平價而停鑄價  
平則鼓鑄如恆欲贏先絀一張一弛夫損上必期益下今錢日賤物  
日貴泉府費兩而鑄一官卒受一而得半是民與國兩弊也謀國有  
道在因時以制宜宜錢則錢重宜銀則銀亦可重散近以錢輸遠以  
銀稱物平施子母相權贏縮有度則錢法不紊而輕重可御矣疏入  
詔下尙書九卿雜議廷臣舉無以相難帝於是以為能擢爲倉場侍  
郎會海漕粟積久紅腐多耗嶠坐督治不謹罷復爲吏部右侍郎進  
拜兵部尙書卒諡文端賜祭葬如故事嶠居官正直有氣幹慨然有

樹立功名之志凡所奏議都百十篇而論通變圖法其意甚美故爲

刪節其辭著於傳云

清史稿 光緒志  
王埜撰墓誌銘

贊曰昔左邱明論晏子之諫齊侯以爲仁人之言其利溥哉故詩稱  
辭之輯矣民之協矣辭之繹矣民之莫矣夫辭不可以已也有如是  
哉究竟二子之議剴切詳明通達國體觀其推古徵今引義慷慨有  
意乎其危論之也趙光指陳時務利害之形於今察之著應昭然嶮  
論泉幣合乎近世經濟二子可謂明達者歟

### 黃琮寶坻傳

黃琮字象坤號矩卿昆明人道光丙戌進士自翰林院庶吉士稍遷  
右春坊左贊善典試廣東還充侍講學士累擢禮部侍郎轉兵部左  
侍郎咸豐戊申疏乞回籍養親兼掌教五華書院是時滇漢回民互

爭廠吏久不決回民怨遂攻剽城邑殺守令以反詔琮與在籍御史  
竇埈督治團練令州縣吏所在聚屯聽約束於總局而按察使清盛  
榜揭有抗命者殺無赦語回民駭惑益恃彊不肯下且進撲省治焚  
南關斷餉餼總督吳振械意在撫回劾琮埈皆落職事稍定振械歸  
罪於埈因奏琮雖負罪然其臨危奮效保全郡城亦欲得當以報前  
所坐過薄請復原官報可同治癸亥正月叛將馬榮攻陷會城殺害  
總督潘鐸及首府縣官並燬書院琮聞變自經家廟遺疏入告詔贈  
官右都御史諡文潔敕建專祠著有知蔬味齋詩鈔演詩嗣音集琮  
爲人貞孝廉儉虛懷若谷愛士憐才博雅好古掌教會城時以詩古  
文辭提倡後進獎勵鎔裁多所成就咸同間滇中耆宿耄俊通古學  
者門下士十居六七惟決策制勝非所長遭際寇亂卒以身殉時論

閔之

清史稿 許印芳  
滇詩重光集小傳

竇埈字蘭泉羅平人父欲峻已有傳埈少純孝有至性八歲喪母悲  
泣哀慕感動左右及長好學自力每夜分起秉燭誦書至曙弗倦道  
光己丑成進士改吏部主事考功司行走丁父憂服除補文選司主  
事除員外郎掌驗封考功二司印歲課一等記名以道府用時倉塲  
竊米案發覺大學士卓秉恬順天府尹陸應穀坐失察交部議尙書  
文慶私謂埈曰上甚怒秉恬欲遂斥去卿宜順上意議抵寧重埈對  
曰吏怠職守有過不舉聞踰月坐奪秩祿不當遽免且上欲罷秉恬  
官一詔書力耳今下部議埈幸得備位銓司進退百僚知守三尺法  
而已屈法徇意雖重得罪不能奉命文慶無以奪遂具劾秉恬應穀  
罪坐削秩留本職自效詔可宣宗崩文宗初即位稍遷江西道監察



御史埶上封事曰臣愚不肖幸得蒙恩拔擢備官臺諫不自知其無以稱職敢緣區區見聞之所及冒言天下事惟陛下擇焉臣聞法者所以適變不必盡同道者所以揆治古今一貫是故三代之教文質異趨所以爲治者一也夫窮則變變則通治得其人法變而道立不得其人法弊而道衰在上者有獨見之明無纖芥之蔽仁民愛物之心孚于天下公選天下之所願以爲輔相者屬之以事至理隆業何憂乎不至而後之人君認認然常恐先王之治不可復見于今日者是不爲也非不能也臣竊惟國家臣一四海休息生民無大兵革旣今二百年矣天下有治平之名而無治平之實有可危之形而無慮危之人祖宗之法非不甚善而有司奉行玩弊不蠲日積而亂是以起今不爲計後之爲天下大患將有所不忍言者抑此非簡陋之士

如臣輩所可以圖治也陛下春秋鼎盛仁孝恭儉繼二祖四宗之緒  
當時運變通之會宜徵賢良通識達材之士專任以事革弊興利更  
定制度合於當世之務凡世儒講論章句研覈詞賦之學非陛下所  
宜留意者也其天下事利害得失之形臣請略言之頃歲以來流品  
多濫士無賢不肖納貲而授官廉耻道喪名器虛賤冒濁苟競習以  
成風國與民皆受其弊先帝深慮及此則議除之而羣臣安于小利  
苟紆一時之困是以詔蠲累下而旋復議行伏惟陛下即位之初即  
停助賑之例又不許選士入粟冒爵以求榮臣常以爲先帝之志必  
行于陛下之手今縱沮格事勢未能即停亦當以次遞蠲夫羣臣之  
所以難罷此例者亦曰府藏空匱故耳使此例行而國富強可待勿  
罷可也今乃不然捐令頻數而例日增舊員銓補無日則失信於民

胥吏書佐市營貨賕奔走競取無所不至巧捷者立登仕籍謹愿者  
不得一命瑰奇之士坎壈而不進陛下所倚以治民者皆豪賈駟豎  
之徒天下安從而治且所謂富國者萬分未得其一也而汙濁之風  
天下皆知亦可謂失計矣今朝廷一二有識之士皆言捐納之爲害  
而國家獨安受其弊此臣愚所未識者也州縣賦供歲損巨萬守令  
期代積逋不追夫以此而求國富強其亦難矣且今賦稅弊耗其故  
有三旱澇害稼而無以供上者患在民困胥史隸卒營私而盜削太  
過者患在吏貪銀重錢輕有司以償補而坐耗欠者患在官匱夫民  
困者可蠲逋吏貪者得刑禁至於官匱則弊積深而難治非先熟察  
利害得失之微孜孜講求磨以歲月則不可以有功何以明之往者  
州縣度支取給賦緡守令興作煩費法當追償而養廉俸粟歲減月

削大府臺使索賂無已夫祿養寡而餽謝不貲至於侵稅豈足爲怪然此越法干紀之事罪之亦何所逃若乃幕客之膏火官府之廚傳隸役之賙惠均派雜作期代抵費征錢易銀償累更多繩以法則罪無可追原其情而法所必宥後期不輸則監追監追物故則均償均償無從而以蠲免聞矣是以新故因仍上下蔽欺歲月累耗而清整無期黠吏因緣大爲姦利而上無所問竭閭里之旨蓄空國家之府藏養千萬汗酷之吏國用不足則開市官之令彼其聚斂所得轉輸官藏以邀好爵有汗酷之實而無刑誅之憂治弊若此而羣臣泄沓猶以爲安且無事臣顧竊爲陛下危之京師食粟取供江南轉千里之漕役數萬之夫官司約束國有成法然自州縣浮斂旗丁要素監卒倉役猾胥姦隸矯虔逗撓弊亦多端誅之則不勝誅不誅則法不

立而國受其殃臣嘗以爲當今轉漕之弊勢有所禁格雖重刑峻典猶不爲止者此其所由來甚遠未可以歲月驟治也春徒役直囊橐簿書纖碎之費逃亡絕戶廢田久荒稅課催比而無所得者法當償自守令一也漕運阻風役錢增倍關纜之費歲歲增加疲弱旗丁或無屯田生業空食廩粟而籍不蠲二也通州經紀本有定直故事粟石取錢二十七文給養北壩名個兒錢間者漕運多滯而徵期急促輓役增雇則費錢必倍假令陛下發詔書蠲省浮斂是使州縣償累益甚役卒營私更無酬直吏役所獲旣微必漸衰散漕粟不時至而京師有乏食之虞且今朝臣非不知浮斂之爲弊也皆以爲偏弊旣去而害且及於全體則曰苟循其弊而已而下之姦猾吏役瞞上苟且無遠大之計侵盜恐揭更無顧憚經紀之費繁舉以委之旗丁旗

丁之用增更以責之州縣州縣之供辦無所出而浮斂勒折及於下  
民下民之財既竭而有司侵盜之術亦窮故法窮則弊滋弊窮而法  
廢天下之紀綱不立而人皆有罔上便私之心豈獨漕運之是敗哉  
並百政以俱廢矣此何可不深慮而遠計之也臣竊觀今鹽課累歲  
倍贏而國家未嘗以此致富者何也夫金穀取財於地地不出則源  
竭珠玉待價於世世不售則流絕煮井煎海以爲鹽井海之水終古  
不爲盈虛是其源未嘗竭也官輸私沽有互爭之利窮鄉僻土無食  
淡之苦是其流未嘗絕也民之生息倍繁而食鹽不竭于供其爲利  
可謂厚矣有百倍之贏而國不收什五之利此甚不可解者也且今  
鹽課之弊亦自不同蜀滇井淡浙地卑隘蘆潞閩粵苦無富賈此其  
弊猶小焉者也臣所睹聞弊深且大者無若淮鹽之甚自煎丁竈戶

運役舟人市僧肆主盜取私貫歲以巨萬計下競營賕而上爽其憂  
譬如強壯之人疾苦風痺失今不治必致僵仆然則救弊之宜惟在  
陛下深察事變所由任得其人而已今羣臣議者嘗以爲關市征稅  
耗絀之由在乎民貧民貧而商運絕商運絕則征稅以敝臣固有以  
知其言之未然也民之用器固緩于食貧則力不能致而儉則貨棄  
於地然今天下生齒日繁風俗習侈錦繡金珠珍奇難得之物好之  
者衆而造之者數雖仍歲凶災民苦饑饉救死而不遑以億萬計而  
錦衣玉食之家亦不少矣賈肆日增而顧謂商貨耗減若此者人非  
下愚誰復信之臣謹按國家制度瀕海諸關市例選內務府司員充  
監督職其他行省大小關或使督撫司道諸臣兼領之吏佐掎斂積  
歲成富習以爲常商賈避征私運盜販吏或不問而錙銖雞豚苛索

嚴責逮于下民天下至今爲謗吏欠官帑或時劾聞上輒復除他官使自救贖或使主修工作委所逋錢于後代相爲補絀至如山海關殺虎口粵海口等處非特官帑無所絀吏當期代且各裹萬金以去夫利益則圖爲私肥不足則委爲官虧賞可謂重法可謂輕此何爲者也臣恐朝廷貪污之俗由此始矣陛下亦嘗深察今水利不修之所由乎江淮河漢中國之大川河患自古已然而江淮漢未嘗病也臣竊按之圖經漢源陝西南注以入江淮源河南東流以入海運河亘南北溝通江淮河起京輔南屬錢塘其間支流通貫維繫牽合而不可分是故漢水淤絕則江溢江溢則淮流無所洩而淮海徐揚皆爲澤國此必然之效也今治河設官徒聞糜財而吏胥侵盜猶不能禁止一旦洪流泛潰漂沒廬舍民庶流離農事荒廢雖議下振卹亦



何救乎民苦又淮河隄防歲歲增作而惴惴焉常恐不免于汜濫之憂資百萬之費而興修水利之效茫如捕風是其爲弊必有深錮難治之勢苟因循不蠲非所以圖效者也今天下帶甲之士百數十萬空耗資糧而緩急不足恃者其故何也且夫亂世之民習於格鬪奔守之事視死傷殘瘐無足介其意則其弊常至於叫呼無賴而上無以禁制治世之民能逸而不能勞酣豢于游戲酒食之際剛心勇氣消耗殆盡痿蹶而不復振邊亂間作則相與恐懼訛言不戰而走是故先王之治兵也天下雖平不敢忘戰秋冬農隙致民田獵以講武事教之以進退坐作之方使其耳目習于金鼓旌旗之間而不亂使其心志安于斬刈殺伐之際而不懼可百年卷甲而不用而不可無一日之備今天下承平久矣聚市井無賴遊惰之民籍之行伍之間

將士上下苟事晏息習吸鴉片脆弱疴瘠有如婦孺論戰守之事則縮頸股慄聞盜賊之名則掩耳不問帥佐惟事侵餉訛增虛籍而兵糧益薄至於剽掠無不爲矣夫舉數十萬老弱之卒守中原萬里之地州率得十數人兵衛寡弱有同兒戲臣中夜以思卽爲寒心使劇賊忍死者十五六人白日入市則守者皆棄甲而走耳陛下誠有意乎富強之計者則凡練軍實倡士果銳之氣不可不深謀而熟斷之也自國家定鼎之初八旗兵役屯集中外歲給丁粟計當時所養無非兵卒外無閒惰之人而家若自有贏益今也生息百倍于昔分一人之衣食以給百人而國家賦供歲歲虧絀是百萬人衣食無所取贍也且廩賜祿養故有常時而旗人不時之需未可以期待也則乞貸米店至於子錢倍本無所償責饑寒無聊則作奸犯科勢有必至

理有固然前大學士富俊奏令八旗人遷屯雙城堡營田廢壤凡房舍耕牛種器並給官司其法固善而旗民久懷佚樂不習耕稼莫肯適從議亦旋罷天下之患莫大乎養安而無事經營養安而無事經營是拱手以待斃也今聚億萬無業之民限之以一城其充溢也指日可待而爲之計也至深且遠而廷臣顧皆委任其所至圖苟無事於目前此臣愚之所謂大患也古者四民交易錢貨尙矣自明正統後稍用白金蓋銀直賤甚于金玉而昂過錢貨且百什倍夫惟賤于金玉也故家無貧富皆可持以通易而其昂於錢直也故行旅賈客易以厚載而輕齎此其爲天下之大利三百年于茲矣今南北銀穴採掘俱竭賈舶外輸積歲大萬錢多而下散於民百里之外滯重難致則多尙銀而棄錢錢出益多而銀流更少豪富居積或藏鏹千萬

物售踊貴粟斗值千錢民始狼顧而貧者無一殮之飽今銀重錢輕  
弊至於此苟非在上者調和盈虛操之以平則不可以有功舍此不  
圖而欲均民富國雖使聖人復起無以善其後矣臣非敢歷詆時政  
苟爲異論凡此九事皆今世重弊天下人皆以爲言非臣一人之言  
也願陛下廣覽庶言使天下之士得盡陳無所隱或身受其害而能  
洞察情僞或素有奇謀而得展舒抱負雖芻蕘之賤庶幾足觀風化  
臣竊見前雲貴總督林則徐在籍太常寺卿唐鑑老成重望謀忠識  
裕先帝親任以遺陛下願下明詔令所在州縣以禮遣送京師任以  
輔弼之寄與議時政損益興革之宜伏惟陛下自愛以成德而自彊  
以赴功知天命之不可常恃知人事之不可怠終拔舉忠賢必盡其  
材而無蔽乎左右迂習之議則大有爲之時正在今日臣愚不勝倦

倦惟陛下恕其狂妄而幸賜省察又上劾大學士穆彰阿潘世恩琦善總督劉韻珂等當英吉利戈船犯江浙海防時內懷恇怯尸祿竊位毀逐忠良不思盡忠補過而迷罔先帝媚寇仇辱國耗帑苟容亡恥無所不至孔子曰鄙夫可與事君也哉穆彰阿等之謂也過惡暴著不宜備大臣位臣請免厥職以示天下當是時金田軍起粵西英吉利既先得志海疆益挾勢陵辱中土民藩圉既失內憂荐至帝方思與一二重臣謀更置天下事埶議既上于是罷穆彰阿世恩官詔起復則徐鑑則徐既行道卒連平鑑至京師屢召見議與上意頗忤遽告疾歸埶以繼母老疾疏乞歸養母亡會江表大亂遂不赴補而滇亂作詔以埶與兵部侍郎黃琮督鄉兵屯守昆明匪酋杜文秀陽遣使人詣城求降總督恆春移書埶琮悉罷鄉兵撤城守匪黨計得

逞進攻昆明恆春恚慚自經死川督吳振械移滇振械庸弱吏殊無能爲益容順匪黨意爲自固計匪黨請駐省城正街市舍埽議執不可振械怒奏劾埽專虐種民賊殺不辜坐起鬪鬩奉職無狀詔奪埽官同治初河南巡撫嚴樹森大學士倭仁前後上書言埽居官正直賢聲夙著不宜以小故遽廢終身帝尋感悟召見埽加知府銜遣貴州省候調主辦城防局至黔一月卒年六十二埽官京師時與倭仁吳廷棟曾國藩何桂珍從唐鑑學以道義相慕悅其爲學宗宋儒嚴理欲之辨篤信而力行之嘗謂士棄富貴而就貧賤不難處而不失其道難死非難求其合于義難爲人多質有威重美鬚髯疏眉廣額身長七尺餘音如洪鐘而恂恂恭儉樂振人之窮急推引後進少年見一善未嘗不稱揚處憂患之地而委天順命始終不渝其守埽始

以名儒立朝剛正嚴毅自許風采傾動當世晚更離亂董治軍旅非其所長然介然持正不爲大府屈既退又無有氣力得位者推挽故終無所就窮瘁以死時論痛惜之所著有晚間齋稿行世

喻懷信  
撰行狀

贊曰清自嘉道以後政治日壞禍亂遂興洪楊割據於東南回徒虓暴於西北其餘草莽颺起者不可勝數滇處邊壤烽候罕聞於時差安而杜文秀一旦以千百強悍忍死之民奔突虔劉曾不浹辰官民駭散城府淪守牂牁以南幾非國有黃琮竇垓始奉廷詔部勒團練處理戎機倉卒之間募集游卒未遑訓厲之事遽當方張之敵而節帥闖茸措理乖方和戰之計猶豫未決饋餉困乏動見齟齬雖有韓白難乎其免不然琮垓固文學侍從之才致身廟堂之上從容諷議補闕直言庶幾賈晁之流用舍其長而責以成效膚受浸及遽見罪

斥悲夫此詩人所以興巷伯菀柳之歎也

陸應穀傳

陸應穀字樹嘉號稼堂蒙自人道光壬辰進士由編修擢御史出授山西朔平知府歷官江西巡撫兼署河道總督以捐備軍饟賞戴花翎入爲順天府尹刑戶兩部侍郎降授直隸按察使多所建白如添兵禦盜禁販罌粟嚴除倉弊封禁礦硿蠲緩糧賦搵掘蛟患均如所請撫河南時值金田軍蔓延始攻長沙繼陷武昌應穀屢上疏言分兵防勦扼守襄樊並陳防堵情形得旨報可復諭應穀駐紮南陽相機辦理已而揚州鎮江各城失陷河南戒嚴應穀馳往歸德防堵擊退永城亳州等處敵擒斬無算尋敵竄豫境歸德失陷應穀馳赴河口會大兵防勦而敵已由柘城直撲開封進犯省城旋復歸德解開



封圍敵復由汜水渡河陷溫縣進撲懷慶許州等處經官軍奮擊敵勢窮蹙遂竄山西陷武安涉縣擾及直境京師戒嚴上以應穀未能先事預防致敵渡河北竄命禔職來京交巡防大臣差委先是以應穀講求堪輿之學命赴東陵西陵協同選建並疏濬各河道復諭相度平安峪成子峪兩處情形及勘永陵河道應修各工授直隸按察使七年卒追贈巡撫銜著有地理或問抱真書屋詩鈔行世

史館鈔傳子光緒志

葆德見宦績傳

贊曰陸應穀歷官中外皆有政聲厥後撫河南時值金田軍蔓延擾及直境京師戒嚴詔旨切責謂應穀不能先事預防禔職調用意者應穀有政治才而應變將略非其所長歟甚矣全才之難也

蕭培元傳

畢應辰簡宗杰附

蕭培元原名培英字鍾之號質齋昆明人先世由撫州移金陵遷滇祖曰讓明洪武初以千戶隨傅友德南征因家昆明培元穎敏好學七歲入塾十一而四書九經畢顧家貧甚又三歲喪母十三喪父兄維新早已棄儒而賈培元年十四命亦學賈在賈肆不廢夜讀至十七乃發憤曰書云作奇技淫巧以悅婦人此豈我所宜爲蓋所習造釵珥業也因請於兄得復讀其叔母孀居與共一燈書聲機聲相和答每至夜分不息弱冠補縣學生道光己亥年二十四舉鄉試第一以貧故座主挈之赴京二十九考取國子監學正三十四補國子監廣業堂學正曾六試春闈均薦而不售咸豐壬子始及第入翰林爲庶吉士既散館授編修文謙督辦天津團練培元襄營務時太平軍侵天津培元晝督兵夜巡營無書生畏懦態事平得獎以詹事府贊

善用充功臣館纂修官並纂修實錄又屢充會試同考官得人稱盛焉迨授山東濟南知府年四十七矣時捻匪北竄省垣東西南關廂人民繁富舊資土圩爲衛屢圯耗費培元請易以石規畫形勢扼其要隘籌款督工急成之甫歲事而賊大至以石圩固不得逞民賴以安兼綜軍械局務督辦力用無缺或議加市商釐捐培元宛轉敷陳卒寢其議其他若平冤獄廣義塾收棄兒等亦多善政旋署濟東泰武臨道值河防戒嚴督工修大清河北岸九百餘里以資捍禦歲飢出賑東平齊東濟陽臨邑等處皆據戶籍散賑規畫井井徒駭河頻年爲害設法濬之患遂息十年以內治效彰彰矣年五十八署按察使襄試武闈得疾而卒培元力學曾手鈔左傳國語國策與秦漢唐宋元明各大家文兩漢六朝各家賦唐詩選名曰舟車便覽善爲詩

有思過齋詩鈔十二卷光緒元年入祀山東名宦子應椿能世其學

中袁嘉穀榜經濟特科

王與慎撰年譜  
光緒續志 採訪

畢應辰字星樓昆明人其先世爲清白吏家貧力學道光庚戌聯捷  
進士改主事少工詩見賞於巡撫林則徐與幕中傅士珍諸人共聯  
吟社通籍後益肆力於詩古文辭同治壬戌由刑曹督學陝甘循例  
加翰林院編修銜旣膺文衡重任力清積弊所拔多知名士如高岳  
崧其尤也差竣轉江南道監察御史巡視中城多所建白手訂悔齋

詩稿四卷同里汪世澤梓以行世

光緒續志 胡壽椿  
汪世澤悔齋詩稿序

簡宗杰字敬甫號南屏昆明人其先世籍江西豫章明季遷滇始居  
昆明宗杰以咸豐壬子舉於鄉成同治壬戌進士官農部郎中光緒  
庚辰卒官年五十六有居敬齋詩鈔十四卷其從孫簡恩植付印行

世訪

贊曰培元應辰宗杰三人皆負經世才而見志於吟詠三人集中多往還酬唱之作工力亦頗相埒惟宗杰浮沈郎署應辰亦未親民培元則由典郡而監司先勞無倦治行卓卓蓋不能以詩人目之矣且孤貧自奮有先漢賃舂牧豕之風足以楷模後進不尤難哉

方玉潤傳

方玉潤字友石一字黝石自號鴻濛子寶寧縣人也雲南文學士多修敕重名節而玉潤才高跡弛自喜道光壬辰年二十二補縣學弟子乙未試優等丙申食餼自是以迨咸豐丁卯都二十年其間應鄉試者十有二應優貢者一應拔萃科者二均不第肄業省會五華書院時設一小骨董市於外仿爲南園板橋書裝池售之以饋貧玉潤

雖阨於科舉顧天資卓越嗜讀書涉獵至博又喜爲兵家言於時金田軍已踞金陵朝廷破格用將帥或以書生驟擢至方面玉潤浩然起從戎思著運籌神機智略等書遂辭父母出川浮江而東越二載父母俱逝所在寇亂留滯不得歸其初至湖北軍營也依黃梅鎮總兵王國才國才戰死則依按察使李孟羣時抵掌談兵事孟羣亦不盡信其言孟羣死皖廬或以其詩文策略示曾國藩跋其智略以爲能窺天地之奧識鬼神之情冥心而孤往者而不留之幕府玉潤亦不愜國藩之論學標舉宋儒也時已叙功得候選州同遂赴京謁選久之得隴西州州同乃之官分廨燬于兵寄居州治著書講學郡守黔陽周振初延主五峯書院者六年所著書得侍郎袁保恆知府李勤伯輩助之貲陸遂繡梓計三十有六種曰乾象鉤元雜誌坤輿圖

隘新編三易原始書緯詩緯禮緯詩經原始唐詩緯風雨懷人集太  
極原樞詩集文集神機三略平賊廿四策星烈日記等統名曰鴻濛  
室叢書然貲時乏亦未竟厥功玉潤交遊遍海內而爲監利王柏心  
所賞爲敘文盛致推挹玉潤要有所以自樹立者非邀譽也玉潤嘗  
欲撰緯書五種以續經其言曰與董子中書世謂三墳五典八索九邱焚自  
祖龍吾則以爲墳典邱索之亡仲尼實啓之何也詩書旣刪禮樂悉  
定周易旣贊春秋復修人莫不奉爲典則家絃而戶誦即其時已不  
知三墳五典八索九邱爲何書故祖龍一炬殘編遂燼惟此詩書易  
禮春秋五者書可得而焚義不可得而泯也故能藏之山巖屋壁或  
口耳傳授以待漢儒以其義精而辭約耳餘則泛焉置之不惜是故  
焚書非祖龍乃仲尼使之也然非仲尼存此五者於人人人口齒間則

詩書禮樂並成烈燄吾又安得循誦而習傳之此刪定功所以與天地侔不獨道隆德盛爲然矣自漢迄今又千餘年天祿石渠蘭臺蓬觀又什百培於墳典邱索使後世不幸再遇祖龍世無尼山其人刪繁而約纂之則雖百庫千倉汗牛充棟亦無片紙隻字留播人間豈不爲天下古今作者一痛哭哉愚不敏竊滋懼焉擬仿尼山舊例網羅羣籍而刪定之爲緯書五種以上繼諸經又恐當世以爲僭因是裴回作輟者久矣雖然擬經以存古僭也焚書以蔑道畔也見及之而不之救則其罪將浮於蔑道吾其興起乎玉潤之撰五緯焉取太極圖說皇極經世以緯易曰內篇而以太玄洞極元包潛虛爲外篇歷代帝王詔誥制敕璽書諸臣工章奏論策有關民生國計者取以緯書輯通典通志通考等九書及列朝會典與夫文公家禮斟酌損



益焉以緯禮削綱目前後三編正其得失以緯春秋亦曰史緯至詩  
緯則玉潤選有漢魏六朝三唐風人定本古今有用之書略具矣玉  
潤好爲謾誕大言要其成就乃在藝事其作書本取徑鄭燮錢澧後  
又參之鍾王各家以及篆分鐘鼎之文頗自矜許彙刻其各體書曰  
鴻濛室叢帖玉潤歿其石刻爲甘肅某市去而鴻濛室叢書稿本未  
刊者越五十年而見於長安市上今歸北平圖書館玉潤弟子顯者  
江西巡撫光州李憲之傳其學者蜀江謝緒岷緒魁兄弟嶺藩撰傳  
贊曰方玉潤才學朗瞻兼多儻謀如逸足之馬不可羈勒若夫刪取  
陳編補拾藝文商略千古上比尼山何其夸也夏書稱知人則哲惟  
帝其難以國藩之賢而玉潤見擯於疎狂抑有由也然則士懷絕世  
瑰異之姿而背棄於明時者多矣悲夫

馬之龍周文龍傳

革字  
言附

馬之龍字子雲麗江人其先世爲回部人之龍長身鶴立少穎慧而嗜學補諸生顧不屑屑爲舉子業獨喜談天下古今利病思有以匡濟於世清自嘉慶末吏治日媮而西洋英吉利輸痾芙蓉入廣州浸淫遍中國人甘之若飴滇處天末鴆毒所被尤烈會提學按臨麗江之龍閉戶密草去官邪鋤劫藥兩論都千餘言試經古日附卷後上之諷以入告使者大詫以狂妄違功令褫其衿之龍遂佩紅毛劍腰鐵笛浩然辭家作汗漫遊足跡遍十三行省見海豐之開而廟謨之不定也潛焉隕涕歸而僑居昆明寄情詩酒間深研浮屠氏書絕口不臧否時事當道雅敬之畏其高不輕造訪惟學使者吳存義五華書院山長劉大紳與投契之龍棲止旣多僦僧舍以故僧徒亦多從

之龍學詩成名者有麗江妙明昆明巖棲而存義時與之龍講內典相悅以解道光末之龍年七十矣歸老麗江惟雲南古爲佛教國自奇渥溫氏隸行省以其先定西域暱回部故行省例設回回參知政事一人而陝甘遼陽嶺北雲南有回回掾史通事知印若干人獨雲南西去天方八千里而近爲朝聖地謁祖師墓者所必經雲南回族之多始于此然回人居中國雖歷世久猶循其國俗與漢民異禮漢民之病喜侵侮外族相愚詐自詡而牧令狃故習輒以偏袒漢民爲盡職回民窮誦無所於訴則發憤叫呶怒目操白刃相殘殺其意以爲吾尋仇報復非叛朝廷也迨後戕官據城則雖欲不爲亂不可得矣故古來苗番羌夷之禍類如此之龍習史事能思深慮遠居嘗從容諷麗江諸回曰漢回積隙深大難將作宜及是時改從漢俗同飲

食通婚媾泯族姓畛畦之見庶幾得免於禍羣回起而詬之未幾之  
龍卒又未幾而杜文秀倡亂回漢民死者十餘萬然伊古回人之能  
具先識者之龍一人而已矣麗江雪山高者十三峯晶瑩蜿蜒秀插  
天半終古高寒故遊屐閔絕之龍獨遍涉其勝蓋亦徐宏祖李雲麟  
之流亞者也葬北郭北雙石橋總督林則徐迤西道王發越與存義

合表其墓之龍所著有雪樓詩鈔卦極圖說陽羨茗壺譜諸書

趙藩撰傳

周文龍字郁雲昆明人少精敏懷經世志家貧爲人傭書奉養母暇  
輒從主人假觀所藏書得魏源經世文編及海國圖志讀而私好之  
益縱覽泰西名理政術之學而究詳之挾其策屢客官府幕草具文  
牘頗出新意所至被禮遇時越南緬甸三數藩邦相繼淪失滇邊戒  
嚴撫臣張凱嵩奏請設儲材館廣納衆言籌保邊之計文龍上書論

變法自強事甚辯凱嵩頗嘉異以爲得所未聞嘗著治滇策十餘萬  
言大略言規復越南緬甸宜效英吉利取印度事先移中土人屯殖  
兩地結附土民蓄厚勢力十餘年後可不用兵力而遂郡縣之又議  
疏小金沙江上游通川楚開八達河屬之交廣利便行賈言皆可采  
用卒年五十四自文龍在儲材館時倡立報館阻時議不行其後錢  
用中主輯雲南日報繼成其業故今滇人士皆推文龍爲新學先進

云錢用中  
撰傳

革孚言字就三騰越人光緒庚子辛丑併科舉人喜讀經世書能爲  
古文科舉既停往任七土司幕府事非其志也辛亥光復舊來鳳書  
院同舍友李根源統師西上孚言已病篤強起撫膺謂根源曰雲南  
接壤緬越英若法據之蠶食吾滇志非一朝土司貪鄙不識大勢吞

鉤餌而甘且橫征暴斂於其民此所謂厝火而處積薪之上也欲邊境稍安非改土歸流不爲功至於怒求浪粟本爲藩垣國人視如狼鹿一任強鄰之狩獵非急起直追經營而開拓之不足固吾圉余病將不久人世吾子高掌遠躡其能成吾志乎明年癸丑孚言卒距生光緒元年乙亥年三十九妻李氏曾刲臂療親疾姑病亦如之後孚

言十五年卒

李根源撰墓誌

贊曰馬之龍切論時病預弭漢回之爭思慮深遠周文龍議復越緬雖近處士之大言亦甚有裨於世務顧皆阨困衆口計無所合尋至國祚崩析藩服攜離莊生有言高言不止衆人之心至言不出俗言勝也夫豈徒君子之不幸家國有同然哉革孚言志在經世改土歸流亦馬周之流亞歟

李澹傳

李澹字星海號菊村趙州人幼孤家貧而好學出天性少師事其鄉王景坡每午間自塾歸輒拾豆以食頃刻即反師憐之留與食宿繇是感奮益力學年十六補博士弟子員授書小西莊余姓家余姓固鄉宦多藏書澹日夜諷誦期年學大進復受學大理桂香書院迤西道羅天池器之期以遠到中道光甲辰科舉人三應禮部試皆報罷咸豐丙辰杜文秀據大理以叛遣其黨分擾旁縣邑彌渡亦陷士子多爲所汙澹避之天目山凡十八年足不履城市亂平復兩應會試部選廣西北流縣知縣改授安寧學正未幾解職主講大理西雲書院彌渡中和書院其試士於帖括外課以算學其後學使歲科試列算學於功令從游者乃服其先見總督岑毓英以澹品學兼優堪爲

矜式疏請叙獎賞加國子監學正銜督學使者高釗中按試迤西與  
瀧會清華驛館講學達旦使者嘉歎鈔其所作書具疏以聞賞加內  
閣中書銜瀧篤於內行明於保身年三十喪妻遂不復取花門之亂  
隱居晦迹不啓人以可汙不假人以易狎著有四書淺說周易淺解  
性統理學等書大氏得之山中者爲多光緒丙申以無疾卒年七十  
八卒之前三日以論語下學而上達知我者其天乎二句命題課士  
其門弟子皆驚曰此孔子負手曳杖之歌也吾師其將易簣乎已而

果然

彌渡  
採訪

贊曰彌渡故隸趙州人材之盛爲一州望乾隆中師氏範谷氏際岐  
同時竝起以著作名字內不百年而李瀧出駸駸與之齊名瀧之學  
不顯主一家凡陰陽纖緯周髀九章下至風厯星角孤虛王相蕃皆



襪祥之書無不探索著爲論說其精者雖星官厯翁莫或過之當是時士方攻制藝以取科第其弊也多空疏而寡實澹獨抗心理數不爲俗學間出其所得爲多士倡導聞者皆驚服至今滇西人士幾無人不知有李先生者孔子稱益者三友友直友諒友多聞如澹者亦一直諒多聞之儒哉

...

...

...

...

...

...

...

...

...

...

...

新纂雲南通志卷二百一目錄

列傳十三

清

褚克昌楊玉科

馬如龍

梁士美

唐友耕

李惟述

夏毓秀

馬忠

和耀曾徐聯魁蔣宗漢馬維騏

馮忠

麻繼曾余轉錄孫宗美馮繼顯

李新張

夏維表

梁士美

張文勝

謝京昌

馮敬齋

馮樹十三

保羅雲南縣志卷一百一目錄

新纂雲南通志卷二百一

列傳十三

清

褚克昌楊玉科傳

褚克昌字俊生雲南縣人由武舉投標學習爲督標右營千總咸豐元年勦廣西山寇獲勝以守備儘先陞用補臨元鎮標中營守備五年寇復擾雲南克昌防勦力以都司儘先陞用六年貴州苗教各匪滋事隨總督恆春赴勦時苗結大寨於翁樹河而分屯米桶寨爲聲援克昌偕副將陳得功由常平山進兵直薄賊壘縱火焚數十寨賊駭遁擒斬數百乘勝追捕巨逆王澄沅等而別股賊據老巢恃險固守克昌與遊擊巴楊阿密計設伏誘之自率輕騎由間道進擣其巢敗賊於翁樹河捷聞以遊擊留雲南補用八月補開化鎮左營都司

復以功賞勤勇巴圖魯名號杜文秀倡亂於蒙化襲踞大理三迤匪徒所在蠶起殺良民據城堡七年澂江曲江江匪犯省城恆春欲戰而將不用命乃與其妻博特氏自經死朝命吳振械督滇張亮基以五品京堂幫辦軍務克昌聞滇變提數千卒轉戰而前鏟城西北敵壘通餉道戰得勝橋土皆一當百匪鋒大挫擢參將亮基既署督益大用克昌克昌以爲三迤匪徒皆奉杜文秀爲宗主文秀踞大理爲僞都大理破羣匪自瓦解三迤不足平也亮基壯其言令克昌以總兵署提督西征西師旣行會城日以克昌露布榜於衢曰某日解鎮南圍破敵白沙井某日克普洲沙橋鸚鵡關霖霖舖雲南驛分兵取大姚姚州某日圍雲南縣城分勦賓川趙州彌渡軍鋒銳甚而師無後繼於是館驛澂江之敵陷廣通楚雄鎮南以斷克昌後而附省之祿

豐安寧亦相繼陷克昌困重圍餉運絕敵知克昌之無援也圍攻益急兵練潰散克昌知必死獨率其子興邦及弁目十餘人衝敵壘與搏戰力竭皆死之亮基聞克昌死嘔血數升遂乞病去事聞照提督例從優議卹贈太子少保銜予諡武烈賞給騎都尉兼一雲騎尉世

職

國史列傳 袁嘉穀  
撰墓誌 湘軍記

楊玉科字雲階麗江人同治初以義勇入滇營二年藩司岑毓英征曲靖見部將顏雲芳戲下有卒騰蹕陷陣召與語奇之拔任隊長保千總旋充營官所向有功八年擢參將從援省城時敵勢披猖號三十萬環省垣西南北敵壘延袤十餘里省東之江右館石虎岡敵碉堡林立悍匪馬添順踞尋甸城與相應毓英令玉科率偏師繞四川會理攻武定元謀大姚祿勸定遠白井易門皆下之遂解省城圍擢

總兵九年與黃文學李維述等分攻姚州永北鎮南補開廣鎮總兵黃文學克永北陣亡毓英令西北各營皆統玉科戒勿妄殺授以春秋左氏傳與論兵事往往至夜分玉科習迤西各城山川險夷毓英因令玉科征迤西遂連克麗江鶴慶劍川浪穹鄧川賓川永昌永北趙州蒙化十一年抵大理大理東臨洱海西倚蒼山自杜文秀踞爲僞都大城內復築土垣守以精卒堅不可拔玉科穴隧道蟄塌東南城率所部衝缺口入敵據土城猶死拒復用地雷破之斬級二千餘玉科屯內較場蓮花池增調五千人還攻僞禁城文秀糾死黨出戰玉科親擊之敵死傷山積文秀敗飲毒僵其黨蔡廷棟昇尸以獻氣息猶屬梟其首解大營時毓英軍次洪崖距大理百二十里二月甲寅毓英至部署撫事蔡廷棟楊榮佯乞款陰埋地雷行館下毓英令



玉科率二百人先入玉科夜潛據礮樓礮發毓英所伏兵遂梯登僞  
禁城巷戰竟日官軍傷亡千計敵死者萬人辛酉敵焚僞府奪門走  
大理三城皆克獲文秀子女并廷棟等百三十人皆伏誅大理平詔  
玉科記名提督十二年二月辛酉克錫臘甲戌克順寧四月庚戌與  
蔡標克雲州光緒二年署雲南提督於時毓英已擢巡撫權總督光  
緒元年滇邊野夷殺英人馬加里英公使訴於朝語連毓英詔劉長  
佑督滇騰越盞達妖賊復爲變討平之玉科功最高自亂事起諸將  
各擁重兵擅生殺疆吏稍裁抑輒據地不稟節度甚者反戈爲變賴  
嶽昭毓英善撫馭能得死力及三迤平勳位已高益恣爲聲色姬妾  
或至數十人橫行一方官民含忍莫敢訟言其失長佑至值土練反  
覆乃調舊部楚軍自川桂入滇而密疏量移諸將兵部乃頒武職迴

避本省例二年遷玉科廣西右江鎮總兵傷病發不赴三年授廣東高州鎮總兵陞署提督十年法蘭西爭地越南廣西巡撫潘鼎新督師防邊奏調玉科隨勦七月統廣武軍三營出關駐諒山十月進扼觀音橋十二月法兵萬餘分兩路來犯一撲谷松一撲觀音橋玉科先設三伏親率大隊迎戰伏發法兵敗退守高岡以利礮自衛我軍分據嶺頭槍礮交攻至暮法人退而我谷松軍失利玉科留兵守橋率精銳星夜援谷松未至而谷松陷官軍退保諒山法兵撲屯梅聞玉科來援則加兵急攻觀音橋玉科留軍助守屯梅仍赴觀音橋防禦數戰皆捷而敵攻諒山急鼎新檄撤屯梅師回援玉科突圍前甫抵三台諒山陷頭台二台皆不守值陰雨山險路滑乃繞道出諒山後力堵鎮南關分軍扼文淵十一年正月敵萬餘撲文淵玉科迎敵

自辰至午斬馘無算陣殲法曾一敵敗走我軍乘勝追擊正鏖戰間  
玉科中礮陣亡事聞賜卹如例贈太子少保銜予諡武愍賞騎都尉  
兼一雲騎尉世職襲次完時以恩騎尉世襲罔替十三年正月雲貴  
總督岑毓英因雲南紳民請疏言玉科隨營苦戰恢復多城又於駐  
軍處所捐資修濬河渠改建書院地方攸賴請於立功死事地方立  
專祠報可玉科雖起家卒伍稍能涉文事嘗手錄從軍紀略兩卷後  
其姪汝翼又爲續錄一卷則紀諒山戰績云部將著名者徐聯魁丁  
槐蔣宗漢宗漢後會馮子材復諒山槐與法人戰臨洮皆有功而玉  
科妾牛氏聞玉科陣亡仰藥以殉

國史館列傳 朱孔  
彰撰傳 湘軍記

贊曰諒山之戰楊玉科忠勇憤慨志殉疆守想其躬冒礮石決首爭  
命橫突胡馬之羣辟易千夫之概誠可壯也向使朝無違議敵愾同

仇糾卒完聚資交廣之饒屬厲兵揚威據海岱之固師以順動何戰不克而視天夢夢民今方殆謀之多族事用不集卒至勇將喪元士氣沮傷操可勝之算坐視遲疑而莫爲之計豈不痛哉褚克昌壯鷲雄傑國之瓜牙身歿名留垂光千禩比於玉科可謂並世關張者矣

### 馬如龍傳

馬如龍本名現建水人先世故爲回中世族如龍叔父濟美官總兵三世死王事如龍少入武庠以勇健聞咸豐間滇亂作如龍起澂江自立爲帥據有新興昆陽晉寧呈貢嵩明羅次易門富民褚克昌西征而匪黨猶在肘腋克昌以深入敗死總督張亮基議撫而提督林自清襲殺匪酋徐元吉如龍跳歸同治元年巡撫徐之銘復主撫如龍降悉反侵地破格授總兵裨將楊振鵬等分署六營武職如龍旣

入駐省垣頗驕倨作威福巡撫以下皆謹事之如龍聞臨元鎮參將  
梁士美嘗梗撫議怒以兵攻士美於臨安大被士美所創而仆失其  
旗鼓被圍於曲江川滇督臣及朝士多言如龍反側朝旨議并懲之  
銘卒慮重起邊亂授如龍鶴麗鎮會馬榮戕總督潘鐸以叛榮與東  
方分據尋甸霑益等城與大理相腹背如龍因致書士美約釋仇回  
師平亂如龍至昆明奮擊敗之追至尋甸曲靖禽馘渠帥迺東平遂  
代林自清爲提督加效勇巴圖魯名號士美旣與如龍有怨見如龍  
功高益不悅而杜文秀以如龍不念同教操戈相向騰書詆之如龍  
亦露布宣言數文秀叛國罪勸其黨向化無自取赤族如龍克尋甸  
禽馬榮磔之以祭鐸奉詔主迺西軍事如龍檄楊振鵬攻賓川副將  
李維述攻鎮南昭通鎮總兵楊盛宗取道四川攻永北署騰越鎮田

仲興攻蒙化護普洱鎮李錦文攻威遠諸將皆受如龍節度六年大軍次祿豐遇文秀兵如龍總兵哈國安副將楊先芝敗之振鵬性陰鷲素不甘下如龍會國安先芝亦欲背如龍數信使往還文秀軍振鵬先叛文秀攻楚雄大姚如龍駐定遠軍數夜驚而總督勞崇光方卒於師諸將或擁兵觀望如龍知回衆不附已則稱疾引兵還昆明七年文秀大舉兵圍昆明如龍以回練不足恃則專倚漢兵城守斥私財三萬金米三千斛濟軍晨夜登陴擊敵梁家河破之振鵬之叛也約國安等爲應至是國安謀刺如龍未遂如龍誅國安先芝益自危伺如龍督陣戰方酣反戈向如龍如龍馳入壁於是馬世德馬文照馬葵等相率叛歸文秀偪南城據江右館將士波駭會李維述馬忠以援師至如龍先嘗輕視藩司岑毓英至是惟述乃勸如龍與毓

英和如龍踵軍門上謁毓英兩人遂交歡誓共功名悍敵數萬出賓  
川如龍遣將禦之武定附省匪突出奪大陘山二壘如龍親擊之拔  
其一毓英攻澂江如龍計破敵又分兵攻城外敵壘下普坪並克之  
八年與毓英攻江右館如龍將銳士突陣中彈流血及踵裏創再進  
士皆殊死戰爭爲先登遂解昆明圍進克武定羅次更勇號法什尙  
阿澂江再陷如龍方臥病聞城外毓英軍金鼓聲力疾赴戰攻克五  
花寺羊神廟乘勝再徧江右館如龍先登復中彈傷事聞賜內府丹  
藥予實授復與毓英分軍攻安寧各隘阨敵歸路勢益蹙相斬獻以  
降振鵬踞昆陽如龍陰遣弁誘執之以獻九年如龍督新興軍赴河  
西拔大小東溝敵壘疊受創越三月小差直抵龍門村奮擊破之於  
是諸軍會師平大理全滇底定賞黃馬褂白玉翎管扳指等十三年

調湖南入都召見保和殿兩宮勞問有加太后曰朕聞汝嘗與林自清角技今當於朕前一試身手如龍頓首起即去朝服爲軍中裝作騰擲攪搏勢畢太后大笑光緒四年創發乞歸如龍性豪縱聲色自娛雲南巡撫賈洪詔嘗彈之有詔勿問既閑廢徙居重慶益不自檢每宴客妓樂聲達旦酒酣輒忼慨道少年作劇事十七年卒優詔卹贈並起專祠昆明除二子官翰林院編修陳思霖奏如龍因緣際會克平猾賊而陰賊險戾幾欲專命幸國禍亂聖朝掩瑕錄用褒賜已

厚豈宜復立專祠損污麟閣之望復詔罷前制云

清史稿  
清史館列傳

贊曰吳甘寧始爲錦帆賊後爲孫權將屢立戰功時稱江表虎臣唐李勣嘗自言我十二三時爲亡賴賊十四五爲難當賊十七八爲佳賊二十爲大將是古來名將固有起自萑苻者無足異也馬如龍其



先亦綠林中人及受撫後矢志忠貞始終如一曾協助岑毓英削平滇亂克成大功官至湖南提督跡其生平殆亦甘李之流亞歟

### 梁士美傳

梁士美字玉山建水人沈毅有大志人莫能測咸豐八年匪攻逼臨安士美散家財募勇卒助鎮將擊賊破蒙自長橋龍頭寨叙功得五品軍功授把總合諸軍攻米曹守碧雞關轉戰祿豐安寧間援晉寧殺虜生口過當屢遷至守備賞戴花翎敵窺省城大掠郊邑人畜士美襲破之江右館獲其渠轉戰富民羅次武定間復其城擊元永草溪阿陋黑琅諸井屬下之士美中槍彈裹創戰遂拔廣通軍次香木橋救館驛會撫局告成巡撫徐之銘檄士美撤兵回屯臨安士美已累遷至臨元參將同治初匪酋李有激以金賂府吏劉發期日據城

殺士美以叛謀洩發伏誅有激夜走免於是馬如龍新就撫顯兵據省城威燄甚張之銘尤畏事如龍有激遂以書抵如龍言臨安獨梗撫局如龍怒立將萬人南攻士美士美與戰殺有激奪如龍大將旗鼓如龍被創顛左右負以趨奔曲江士美圍之總督潘鐸檄如龍撤兵士美實阻如龍歸路如龍大困會回酋馬榮襲踞昆明戕潘鐸軍中無帥獨藩司岑毓英以孤軍力戰如龍乃告士美各釋私仇雪公憤士美許之如龍貽士美槍彈火藥士美亦選勁勇助如龍如龍返抵省與毓英共擊賊馬榮遁如龍自是不敢復恣睢作氣勢矣士美積功至游擊賞綏勇巴圖魯名號而如龍部將楊振鵬等叛如龍以萬人圍江川士美設奇計擊破之復破臨郡夷李春衆總督勞崇光援雲州而官軍潰楚雄士美以精卒守易門通海自帥輕兵戰晉寧

敵轉攻臨安士美還軍擊走之合前後功遷署臨元鎮總兵兼領騰越鎮事加授副將同治八年巡撫岑毓英督諸路軍進討杜文秀檄士美來省會議士美先疑毓英袒如龍頗怨望遲迴不即行顧毓英實不嫌如龍十年毓英攻館驛檄士美會勦士美至不通謁巡撫毓英怒遂以跋扈奏劾士美自軍興以來鎮將以餉不時至輒派弁代徵釐金錢糧及井地課稅致藩司無由綜核所在皆然士美起兵討賊亦遣吏下邑募巨室金藉充軍賦所任或非人頗擅威令脅辱士夫營取私錢又邑多姦盜頗寇攘爲患士美一繩以嚴法雖親故不宥以是官民咸不便士美交口沮譖乃共嗾軍吏沈朝輔爲變謂士美死可得代鎮朝輔遂刺殺士美於天君廟毓英私喜士美得速斃以仇殺論奏斬朝輔如律其餘黨輩卒不窮治至士美征戰功狀悉

棄不錄奏云

袁嘉穀撰傳  
清史稿

贊曰論者謂士美跋扈以此取敗是固然矣然而保境息民使臨安一帶老弱婦孺免兵燹流離之痛苦者繫維士美是賴故當時之人稱之後世之人亦稱之抑公論之不容泯滅者也假令士美當日下則捍衛閭閻上則遵從命令參酌乎寶融錢鏐之所爲其庶乎可以無憾乎

### 唐友耕傳

唐友耕大關人少僇悍有材力家貧無以爲生從滇賊李永和爲盜咸豐九年永和寇叙州友耕脫身來歸從攻永和連下諸山賊壘追擊至犍爲火其積聚積功補千總署通江營守備戰新橋水口解邛州圍友耕功多授守備官賞戴花翎從攻峨眉軍次鐵索橋賊傾衆

來犯友耕率所部士兵爲先鋒鼓譟而進賊大潰犇趣攻洪雅雙福  
場賊屯下之又破賊平茅山貓子墳遷川北左營游擊加額勒莫克  
依巴圖魯號收復丹稜縣城走潼川賊累除副將坐援綿州軍無功  
落職留營自效從破眉州賊叙功復前官拔青神柵賊渠帥卯得興  
以衆數千壓參將陳祥興營友耕奮擊斬其帥張興得興負創走賊  
衆圍友耕數匝持短兵接戰友耕身被數創卒馳馬奪陣出聚衆復  
戰自旦及暮所斬獲過當進加總兵銜同治初太平軍石達開攻圍  
涪州友耕馳禦敗走其衆補授四川重慶鎮總兵累戰長寧大母山  
乘勝追北至橫江拔壘數十再破之新灘溪餘衆走松林小河糧儲  
告盡阨官軍不得進還具舟楫且謀渡江友耕襲擊沈其舟十七八  
達開困急單騎奔老鴉漩土兵擒縛以獻大府奏功擢雲南提督移

軍蜀南討平號匪有功遭母喪罷歸服闋起服本職會匪寇昭通友

耕進討降破其衆斬賊酋李本忠遂平魯甸賞穿黃馬褂光緒初改

授四川提督八年卒官下詔褒卹賜祭葬附祀故提督占秦祠

清史稿

贊曰聞唐友耕任四川提督時喜刻書其漢魏六朝百三家煌煌大

集亦曾付諸手民友耕雖不能著書而能選刻古人所著之書嘉惠

士林友耕亦儒將也哉卻穀說禮樂敦詩書較諸祭遵之雅歌投壺

羊祜之輕裘緩帶尤勝一籌矣

李維述傳

維清史稿  
作惟誤

李維述字信古楚雄人起錦江紳團營與和耀曾施方略謀所以綴

寇故省城獲保無事逮馬榮敗匪衆走城外猶留頓弗去毓英患之

召維述計誅其悍將悍將故暱維述一日天嚮明維述率千人入其

壁悍將方沐詰所來維述曰奉上官檄討野夷不識路徑故來問悍將指畫以示維述從其背擊殺之大呼曰爲兵者出前門從逆者出後門匪衆驚散省城遂無寇蹤累勛至都司補鶴麗鎮游擊克楚雄遷參將署維西協與經歷鍾念祖分攻廣通南安下之補順雲協署開化鎮總兵仍留駐其地無何敵涌至城再陷維述慮殘民佯議和卒以計脫歸坐免是時省城復震馬如龍專倚漢兵守城維述分領其衆內詰奸宄外禦強敵省城復安論功復故官從毓英攻楊林敵敗潰然猶堅守小偏橋十里舖冀斷我糧餽維述乘勝克一撮纓蕭家山又與岑毓寶攻克石虎岡譚道始達進平羅次復楚雄軍勢大振已而西軍又告急毓英謂西軍弛律咎在諸將不和迺以大理麗江軍事屬玉科而屬維述以雲蒙趙維述遂攻克鎮南鎮南爲大理

屏蔽敵以全力死守至是拔之敵勢益蹙上念其苦戰賜珍物迺西  
用兵頻歲飢嗛先是維述遣軍攻雲南久弗克彌渡亦旋得旋失嗣  
與玉科謀迺檄諸軍毋浪戰期秋穫整軍屆期果大破雲南驛分兵  
略彌渡並克之又與玉科會軍蒙趙杜文秀者故永昌纍初匿大小  
圍埂其據大理也圍埂匪實助之玉科圖取大理維述亦統兵克大  
圍埂而小圍埂猶據壁自保踰歲轟克之檄署騰越鎮收其地進攻

烏索未下遭憂歸不復出久之卒於家

清史稿

贊曰史稱岑毓英所部多驍將楊玉科外首推維述又稱毓英平滇  
楊李功爲多是維述之與玉科其始蓋有並駕齊驅之勢者及其後  
也玉科攻克大理晉錫男爵殉難鎮南建祠予諡而維述則以騰越  
總兵遭憂家居老死牖下暮年遭際判若雲泥古人謂李廣數奇豈



不誠然乎哉

夏毓秀傳

夏毓秀字琅溪昆明人少以義勇著滇亂起以堡長從軍充選鋒昆明被圍久糧餽阻絕道殣相望毓秀率團勇助擊餽道始通補千總師克路南祿豐積助至守備同治二年岑毓英引兵西遣毓秀略富民禽其酋馬富富馬榮弟也乘勝克嵩明陸涼武定署參將毓英慮元謀匪撓後路使毓秀要之攻克附城巨壘偪攻縣城截其糧路敵患飢乏棄城走進復馬街三年匪酋李芳園陷白井擊卻之規曲靖師屢失利毓秀至敵狃數勝易視之且登城作謾語毓秀憤甚率死士先登疾擊之敵大潰合兵下霑益馬龍明年補提標右營游擊統領四十八堡民兵七年敵陷祿豐毓秀敗績退安寧分兵阨腰站祿

賤踰歲敵涌至再敗毓秀退入省城坐免官已而敵大舉分道入馬  
如龍出大西門禦之參將楊先芝等倒戈相嚮毓秀被重創又明年  
攻楊林擊破十里鋪復官毓英規安寧毓秀自篋郎繞出碧雞關下  
潛師襲大小普坪克之進取獨樹鋪會岑毓寶復其城九年論克廣  
通南安功遷副將十年攻東溝敵出拒敗之師深入毓秀陷重圍逕  
路危陘棄馬步戰身受十數刃如龍馳救昇歸壁暈眩死有間蘇將  
校環泣毓秀慨然曰丈夫以身許國馬革裹尸固大快事奚悲爲聞  
者莫不感奮創小差整軍復進卒夷敵壘擢總兵賜號利勇巴圖魯  
移攻雲州敵築礮環城誓死守師久攻不下毓秀先分兵奪礮孤城  
危棘敵無固志遂拔之以次復騰越及大小猛統十三年入覲上垂  
視傷痕慰勞備至益感激愿用命會創發乞歸光緒二年赴四川統

領省標十營七年松潘番蠢動數擾邊命署總兵治之既至禽首惡  
撫良懦番民以安其地固荒服設學額百餘年多爲他邑人所占謳  
誦益寂寥毓秀方夷大難即選聰穎子弟入署讀書斥私財建書院  
廣延名宿崇化厲賢至是始聞弦歌聲九年實授蒞鎮十載培堤岸  
濬溝洫儲倉廩士民德之至建生祠以祀二十年朝鮮亂起日軍侵  
奉天毓秀自請赴前敵比入京而和議成會鹿傳霖出督四川奏毓  
秀自隨於是再蒞松潘鎮任初甘肅循化番族拉布浪寺夙强悍數  
越界侵掠毓秀初蒞鎮遣兵防守安撫餘衆而拉布擅命如故既復  
任遂率將士出關克碉十餘禽渠率斬以徇諸夷諸夷皆服莫敢惕  
息蜀邊寧靜擢提督巴塘西三巖野番數入邊商旅苦之號稱夾壩  
毓秀率衆入其部落招誘首領宣播朝威動以禍福利害諸番皆束

首歸命晉頭品秩二十六年授貴州提督會拳亂作亟統兵入衛抵  
蒲州車駕西幸命率師駐韓侯嶺許專摺奏事明年調湖北命分所  
部留守太原毓秀以三子瑞符領六營詣防而自率全軍隨扈北上  
尋移廣西踰歲行次廣東總督陶模奏署陸路提督九月還湖北宣  
統三年創發卒於官謚勇恪毓秀性忠樸不治家人生產治軍數十  
年布衣蔬食見者不知其爲專閩云

清史稿

贊曰史稱夏毓秀於兵燹後崇儒興學爲知本是固然矣而其秉性  
忠樸治軍數十年布衣蔬食見者不知其爲專閩亦難能而可貴者  
近代軍人率多崇尚豪奢衣食住行幾與資本家相埒奢者必貪流  
弊滋多忠樸如毓秀可以爲軍人之模範也已

馬忠傳

馬忠字培芝呈貢人道光戊子科武舉安邦之孫也家世回教性尙武幼讀學庸等書不解其義因質塾師何以致用師無以難之又嘗與同輩戲數十人皆聽其指揮讀二年即輟學務農及長喜爲鄉里排難解紛時縣令催科急忠挺身自任甲長以荒歉請緩期忤縣令被撻幾死遂逃之昆陽海口依揚振鵬部下並糾集里中年少躬率千百人嘯聚一方矣同治元年署總督徐之銘議撫忠乃與馬如龍等反正厥後清反側解省圍忠之力居多當杜文秀派十八大司犯省時城外多敵軍而內奸潛伏變在旦夕忠乃命子柱率兵駐得勝橋保省城又隻身往萬壽宮香海菴等處誘馬學林馬雲龍至巡防總局誅之內患旣除敵軍亦敗省會始轉危爲安旣而克復呈貢晉寧澂江昆陽等地餘黨以次廓清惟館驛負嶼未下館驛屬建水縣

匪自丙辰倡亂踞爲老巢疊犯省城數陷郡邑黨悍巢堅甲於三迤  
忠隨岑毓英駐師通海單騎深入誘匪首馬敏功納善等至通海誅  
之館驛始平後滇省軍務肅清有僞總督馬德新尙稽顯戮德新係  
回中掌教爲人陰狡多智屢降屢叛皆其主謀馬榮之戕總督潘鐸  
也德新實使之至是自知稔惡竄匿新興北城忠奉令誘至呈貢安  
江戮之元凶授首民心始安綜計忠數十年中披堅執銳樹績頗偉  
而於解省圍平館驛諸役尤爲滇人士所嘖嘖稱道云歷署督標中  
軍副將普洱鎮總兵實授鶴麗鎮總兵加秩記名提督頭品頂戴希  
林巴圖魯賞穿黃馬褂其署普洱鎮總兵也九龍十三猛土司互相  
殘殺歷二十年不休而六順土司刀世熙尤狡詐陰謀篡車里宣  
慰職各猛多歸附者世熙愆戇構釁忠蒞任以計召之來數其罪斬

之各猛遂定其沈毅類如此卒年八十有二配馬氏生子四次柱勇

敢善戰官至臨元鎮總兵

秦光玉  
撰家傳

贊曰咸同之際滇境騷荃蕙化茅時勢然也忠之海口嘯聚迫於  
貪吏不得已而亡命耳議撫而後回曾之先後授官者不下數百人  
其能始終如一者忠與如龍二人而已忠之可傳豈僅以其智勇哉

### 和耀曾徐聯魁蔣宗漢馬維麒傳

和耀曾字榮軒麗江人父鑑大理城守營都司咸豐二年太和匪謀  
亂鑑奉檄往覘之被殺贈雲騎尉世職耀曾涕泣矢復仇毀家養士  
與賓川廩生董文蘭會師洱河兩克大理及鄧川上關軍威著遠近  
楊玉科張潤皆隸耀曾戲下後皆得專征爲時名將總督吳振械薦  
耀曾才署中營守備十年權維西協左營都司明年大理匪來犯敗

之於橋頭已而祿豐昆陽陷復率把總高聯甲戰石鼓大破之乘勝  
攻克麗江留土弁王天爵駐守耀曾自引兵規鶴慶敵乘隙再陷麗  
江耀曾軍失利退守石鼓同治元年再克之遷參將徙鎮曲靖夷卡  
郎匪巢略昭通爭公雞山龍洞戰弗利昭通鎮楊盛宗來會師斬其  
酋遷副將徙屯富平八年富平陷詔奪職檻車徵未行以克楚雄祿  
豐功得勿治留軍觀後效十年克澂江開復原官明年攻迤西連破  
蒙化趙州上下關於是大理藩籬盡失是冬穴地道轟其城拔之又  
明年取大小圍埂積勳晉記名總兵賜號達春巴圖魯與楊玉科定  
錫臘下順寧破雲州擢提督進克小猛統大吏以叛產給殘廢部伍  
耀曾辭弗許迺斥家財遣軍士歸而以其產佐書院生餐錢及賓興  
費並選開敏子弟集解字延師課讀又與李維述克騰越全滇平賞



黃馬褂檄署永昌協永昌自遭喪亂比戶凋殘耀曾撫流亡除苛擾革姦暴教之治生民漸復業烏索賊柳映蒼叛奉檄與總兵徐聯魁擊之以次削平諸土司之不服者光緒二年參將胡開先誘練軍爲變據騰越而順雲姦猾吏及悍卒一時蠢動永昌練日李朝應之掠施甸迤西大擾岑毓英以耀曾諳究邊情奏署騰越鎮總兵耀曾爲固本計先赴永昌調團營守隘自率師進討擊斬李朝餘黨悉平總督劉長佑以耀曾不即赴騰越方効之鑄二級論克順雲功免議遷權漢中鎮總兵六年詔各省督撫舉將才毓英以耀曾應擢授鎮遠鎮居鎮遠十六年節虛糜廣儲積置營田建兵房製器械軍政大治復以其餘資設義塾平道路勸農桑士議謂有儒將風二十三年卒民感其德請附祀毓英祠麗江亦建祠致祭焉

清史稿

徐聯魁字映斗姚州人父濟本郭氏子贅於徐生聯魁聯魁沈勇有大志弱冠從戎時匪寇掠維西中甸間殺害吏人間邑騷然聯魁集鄉子弟數百人擊敵連破走之以功授把總銜從平鎮雄賊再討定黔苗同治初匪酋圍昆明聯魁隨楊玉科帥部出川境假道南行敗敵小偏橋通敵內聲息後軍繼至遂大破敵省城圍解又西徇下姚趙二州安遠雲南諸縣進拔大理城亂平自千總累擢至總兵記名提督賞穿黃馬褂授雲騎尉世職歷署維西永昌順雲諸協遷騰越鎮總兵除維西協鎮攝雲南提督父喪去官服除起爲四川越嶲營參將隨玉科與法人戰鎮南關外師旋調署阜和協阜和地偏瘠民苦剝斂聯魁令減省賦十之三又解禁西寧玉樹及德爾格式兩夷落閱變務以恩惠輯撫番漢民數年之間威信大行光緒二十一年

卒於鎮民皆號哭衢祭如失父母軍興以來滇中將領多驕蹇好折辱士大夫獨耀曾聯魁所至能謙恭下士其戰績或不如玉科如龍然皆雍容有儒將風聯魁勇於任事遇下有恩官阜和時值歲饑疫聯魁備醫藥量給粟麥居處民賴以存活者衆其家居不問生產業雖貴顯衣服飲食如少賤時獨好賙給宗族室無餘藏事父至孝與弟甚相友愛弟聯級早亡撫養孤女不異己出天性仁厚在武臣中

號難能也

甘季賢撰  
墓誌銘

蔣宗漢字炳堂鶴慶人少以武勇從軍咸豐六年杜文秀陷大理旁掠取滇西郡縣宗漢禦戰禽斬功多敘銜七品軍功從下維西鶴慶破鎮雄州賊皆有績宗漢爲人魁岸有威容工騎射臨敵身先士卒所至披靡同治中黔西苗據豬拱箐海馬姑以叛岑毓英遣宗漢往

討苗賊阻谿崖深處築壘拒守官軍進攻中賊伏頗多傷亡宗漢帥  
銳卒裹糧披荆榛潛行抵賊壁下多鑿地道引熇火藥轟陷崖壁十  
餘丈士卒譟登賊卒不意皆奔潰相蹂踐斬賊帥陶三春拔壘十數  
累功拔千總加守備官從楊玉科攻圍姚州別道出四川會理推鋒  
南進連破麗江永北鶴慶劍川賓川鎮南嵩明七州縣進下昆明敵  
乘間據偏橋陷河北二碛斷官軍饗道宗漢以兵四千當先鋒奪碛  
通路別作壘居守敵環攻旬日會援師至宗漢出戰前後合擊敵大  
破之收復大姚趙州蒙化三城身被創輒扶痛起督厲士卒銳氣益  
倍斬其首馬錫慶藍平貴馬金保永漾盪清等五人降衆萬餘宗漢  
軍下關與玉科合勢攻大理城下之文秀自酖死又西徇下順寧雲  
州擊走大小圍堧敵亂平累遷騰越鎮總兵加雲騎尉世職會騰越

民仇殺英人馬加里事聞英使牒索主名甚急宗漢坐奪官起爲越  
嵩參將遷阜和協副將光緒初法蘭西犯桂邊宗漢以步騎從楊玉  
科屯守鎮南關玉科戰歿宗漢集散卒復戰諒山勇憤並發挾雙銃  
左右馳擊解而復合者數四手殺敵將卒百十人獲甲仗無算乘勝  
復北寧敵望風敗走會和議成賞頭品頂戴除授貴州安義鎮總兵  
擢提督改雲南二十九年卒官年六十四詔賜祭葬諡壯勤宗漢始  
居親喪時匪酋馬金保數過其家強加以爵秩宗漢陽許諾夜間道  
走官軍營及金沙江追賊四合宗漢窮急無以渡指江水誓曰苟天  
相吾漢民幸存活宗漢身他日必滅盡此賊忽一浮槎隨流至因得  
渡脫去其後貴仕乃出資造梓里橋江上利便行旅人至今稱德云

國史  
館傳

馬維騏字介堂阿迷人少雄健寡言自許頗學兵略慷慨喜功名咸豐間以武庠生從軍爲小校隨師討匪下霑益馬龍二州有功選補開化鎮右營右哨千總從解省城圍復楚雄新興永昌諸城邑平騰越敵壘稍遷都司補用游擊加副將銜賞戴花翎擢授參將奉檄管帶綏遠左營練軍光緒初法人寇安南維騏守興化進攻宣光累敗敵騎大獲馬畜輜重敵皆走還城拒守進兵圍之敵將卒惶窘夜以竹筩盛書沿流抵大營維騏輒收取之諸軍攻城轉亟礮火毀城中屋舍殆盡破在旦夕而劉永福軍當敵戰數不利大府檄維騏赴救因撤圍去維騏至左城與敵大兵遇戰日中大破敵乘勝追至臨洮俘斬千百計永福以全維騏功爲多大府表維騏以副將擢用加博多歡巴圖魯號張登發據倮黑地反維騏帥兵禽斬之又破木戛寨

叛賊又擊越匪於都章俘殺千餘人累以功自普洱臨元二鎮總兵改守爲眞遷鎮昭通再遷廣東陸路提督改四川提督時巴塘喇嘛賊殺駐藏幫辦大臣鳳全合土司衆以反維騏先已平秦凝寺叛僧隨引軍進討時方隆冬風雪行深山巨谷輓輸艱阻軍無旬日糧維騏撫士卒有恩衆皆奮厲效死至則破走其衆追擊克木多雅巴廟殷拉格象山巴當賊屯皆下之賊平上功賞穿黃馬褂頭品頂戴維騏爲將整飭部伍號令嚴明雖平居無事不廢候衛又創立將弁學堂遣軍人子弟之秀異者歲時講肄戰陣之事治兵經武甚有聲稱

宣統二年卒官詔賜祭葬進二子官如例

清史列傳

贊曰孔子稱勇而無禮則亂夫文學之士敦禮讓多屈於威稜驍勇之夫重武毅而毗於暴悍二者皆失然自後世一曲之士不能無稍

偏取焉與其柔脆寧失擴悍若夫耀曾聯魁宗漢維騏四子之爲將也砥行敕身廉謹有度撫循部卒武而能整美哉乎其能忠厚自牧者也將其疾夫作亂犯上之徒殷鑒不遠者乎故能功傳竹帛慶留後裔論其行事君子蓋先見之矣